

REGLUR UM STYRKI VEGNA HLEÐSLUSTÖÐVA FYRIR RAFBÍLA VIÐ FJÖLEIGNARHÚS

1. gr.

Gildissvið

Reglur þessar taka til styrkja sem Akraneskaupstaður og Orkuveita Reykjavíkur veita til húsfélaga fjöleignarhúsa á Akranesi til kaupa, uppsetningar og tengingar á hleðslustöðvum fyrir rafbíla á sameiginlegum bílastæðum á lóð viðkomandi fjöleignarhúss. Grundvöllur styrkveitinga er samkomulag Akraneskaupstaðar og Orkuveitu Reykjavíkur um uppbyggingu innviða til hleðslu á rafbílum á Akranesi dags 7.júní 2019. Aðilar hafa ákveðið hvor í sínu lagi að setja allt að 4 milljónir til verkefnisins yfir þriggja ára tímabil til styrktar uppsetningum á hleðslustöðvum fyrir rafbíla við fjöleignarhús, eins og nánar greinir frá í reglum þessum.

2. gr.

Styrkhæft

Veittur er styrkur til eftirfarandi þátta:

- a) Kostnað vegna ráðgjafar sérfræðinga um hönnun hleðsluaðstöðu fyrir rafbíla við viðkomandi fjöleignarhús.
- b) Allan efniskostnað við að koma upp hleðslubúnaði fyrir rafbíla á lóð viðkomandi fjöleignarhúss þ.m.t. hleðslustöð, raflagnaefni og festingar.
- c) Vinnu jarðvinnuverktaka og iðnaðarmanna við að koma fyrir raflögnum, setja upp hleðslustöðvar, tengingar raflagna og yfirborðsfrágang.
- d) Kostnaður við leyfisveitingar og heimtaugagjald.
- e) Styrkur er einungis veittur til miðlægrar hleðslustöðvar þar sem allir íbúar viðkomandi fjöleignarhúss geta notið. Húsfélagi viðkomandi fjöleignarhúss er heimilt að opna hleðslustöðina fyrir öðrum viðskiptavinum en íbúum viðkomandi fjöleignarhúss.

3. gr.

Umsóknir og skil á gögnum

Fulltrúi húsfélags skal sækja um rafrænt á vef Akraneskaupstaðar www.akranes.is. Umsókn skal skila og fá samþykkt áður en búnaður er keyptur og framkvæmdir hafnar. Þó er heimilt að leita ráðgjafar sbr. a-lið 2. gr. áður en sótt er um styrk.

Með umsókn skal skila lýsingu á framkvæmdinni, fjölda og staðsetningu hleðslustöðva sem áætlað er að setja upp, kostnaðaráætlun, tilboðum verktaka og hversu háan styrk sótt er um. Jafnframt skal fylgja lýsing á því hvernig gjaldfærslu fyrir notkun hleðslustöðvanna er háttað.

Umsókn skal fylgja samþykki húsfélags fyrir framkvæmdinni og breyttri notkun bílastæða sem ætluð eru til hleðslu rafbíla.

Ljúka skal framkvæmdum innan 6 mánaða frá því umsókn er samþykkt. Sé framkvæmdum ekki lokið innan þess tíma fellur vilyrði um styrk niður og þarf að sækja um að nýju. Að loknu verki skal skila afriti af kvittunum fyrir öllum kostnaði sem sótt er um styrk fyrir, yfirlýsingu löggilds rafverktaka um að verki sé lokið og uppfylli allar kröfur þ.m.t. lokatilkynning til Mannvirkjastofnunar, ljósmynd af hleðslustöðvum og er þá greiddur út styrkurinn.

4. gr.

Kröfur til hleðslubúnaðar og raflagna

Hleðslubúnaður sem settur er upp, lagnir og allur frágangur skal uppfylla í öllu kröfur í íslenskri löggjöf til raflagna og -kerfa og frágangs á þeim. Vinna við raflagnir og tengingar skal unnin af löggiltum rafverktaka. Fylgja skal leiðbeiningum Mannvirkjastofnunar „*Hleðsla rafbíla og raflagnir*“.

5. gr.

Styrkupp hæð

Hámarks styrkupp hæð til hvers húsfélags er 1,5 m.kr., ein og hálf milljón króna, þó aldrei meira en sem nemur 67% af heildarkostnaði verksins með virðisaukaskatti, skv. 2. gr. sem greiddur er í samræmi við framlagða reikninga skv. 3. gr.

6. gr.

Takmarkanir á styrkveitingu

Styrkur er veittur til fjölbýlishúsa með íbúðum (íbúðarhúsa) vegna hleðslubúnaðar sem settur er upp á sameiginlegum bílastæðum innan lóðar húsfélagsins.

Hleðslustöðvar skulu vera aðgengilegar öllum íbúum húsfélagsins. Þetta krefst þess að hleðslustöðvarnar séu í eigu og umsjón húsfélagsins og hugað sé í upphafi að því hvernig kostnaði er skipt á milli þeirra sem nota hleðsluaðstöðuna. Hleðslustöðin skal geta haft samskipti (t.d. gsm) við miðlæga gagnasöfnun, sent upplýsingar um notkun og hleðslutíma til reikningsfærslu á hleðsluþjónustunni, vera búin búnaði til auðkenningar t.d. Rfid (Radio Frequency Identification) og hafa möguleika á álagsstýringu (t.d. skv. staðli OCPP 1.6) a.m.k. í framtíðinni.

Styrkur er greiddur á kennitölu skráðs húsfélags skv. fyrirtækjaskrá Ríkisskattstjóra en ekki til einstaklinga. Aðrir lögaðilar geta ekki sótt um styrk.

Ekki er veittur styrkur til húsa í byggingu og ekki er veittur styrkur til framkvæmda sem eru hafnar eða lokið þegar sótt eru um styrk.

Styrkur er eingöngu veittur til fjöleignarhúsa með 5 íbúðum eða fleiri samkvæmt skráningum fasteigna hjá Þjóðskrá Íslands.

Gerð er krafa um að viðkomandi húsfélag reki hleðsluaðstöðuna í að minnsta þrjú ár frá uppsetningu, að öðrum kosti áskilur Akraneskaupstaður sér rétt til að krefja húsfélagið um endurgreiðslu styrksins.

Styrkir eru greiddir í samræmi við fjárhagsáætlun Akraneskaupstaðar og Orkuveitu Reykjavíkur hverju sinni og umsóknir afgreiddar í þeirri röð sem þær berast. Fari skuldbindingar til styrkja á einhverjum tíma umfram höfuðstól sjóðsins má vísa óafgreiddum umsóknum til úthlutunar næsta árs. Um slíkar umsóknir gildir áfram að umsókn skuli fá samþykka áður en búnaður er keyptur og framkvæmdir hafnar.

7. gr.

Ákvæði til bráðabirgða

Í upphafi verður gert frávík frá þeirri reglu að úthluta í þeirri röð sem umsóknir berast, sbr. 7. mgr. 6. gr. Gefinn verður frestur til 1. desember 2019 til umsókna um styrk frá birtingu reglna þessara. Að þeim fresti loknum verður umsóknum forgangsraðað, í fyrsta lagi eftir fjölda hleðslustaða og í öðru lagi eftir kostnaði þar sem lægri kostnaði á hvern hleðslustað, er raðað frammar hærri kostnaði.

8. gr.

Ágreiningsmál og breytingar á reglum

Ágreiningsmálum varðandi styrkveitingar samkvæmt þessum reglum getur íbúðareigandi skotið til bæjarráðs Akraneskaupstaðar.

Breytingar, sem samþykktar kunna að verða á reglum þessum, hafa ekki áhrif á styrkveitingu til þeirra, sem áður hafa fengið jákvætt svar við styrkumsókn, sbr. þó 3. mgr., 3. gr.

Samþykkt í bæjarráði Akraness 10. október 2019

Samþykkt í bæjarstjórn Akraness 22. október 2019

Fyrir hönd Akraneskaupstaðar,



BÆJARSTJÓRINN
AKRANES

Sævar Freyr Þráinsson

bæjarstjóri